

20/01/2001

Keluarga sambut baik pelantikan Abdul Hamid

BAGAN DATOH, Jumaat - Keluarga bekas Ketua Pengarah Jabatan Kemajuan Islam Malaysia (Jakim), Datuk Abdul Hamid Zainal Abidin menyambut baik pelantikan ahli keluarga mereka sebagai anggota baru Kabinet.

Adiknya, Abdul Rashid, 53, dari Kampung Tanah Lalang, di sini, tidak menduga abangnya dilantik sebagai Menteri di Jabatan Perdana Menteri.

"Saya hanya diberitahu seorang rakan, pesara guru, Samsi Minan melalui telefon ketika dalam perjalanan ke rumah dari Teluk Intan, kira-kira jam 5.30 petang, Selasa lalu.

"Keluarga bersyukur dan berterima kasih kepada Perdana Menteri, Datuk Seri Dr Mahathir Mohamad yang prihatin dengan kemampuan Abdul Hamid," katanya ketika ditemui, di sini, semalam.

Abdul Rashid yang juga Ketua Kampung Tanah Lalang mengulas mengenai pelantikan abangnya itu.

Abdul Hamid, mendapat pendidikan awal di Sekolah Umum Kampung Tanah Lalang sebelum mengikuti pengajian sistem pendidikan sekolah pondok di Madrasah Irsyadiah Batu 26, di sini.

Beliau menyambung pelajarannya ke Madrasah Alawiah, Arau, Perlis sebelum memasuki Kolej Islam Klang .

Abdul Hamid kemudian melanjutkan pendidikan ke Universiti Al-Azhar, Kaherah sebelum ke Muslim College London.

Sebelum dilantik sebagai Menteri, Abdul Hamid menjawat beberapa jawatan penting termasuk Pengarah Kor Agama Angkatan Tentera (Kagat) di Kementerian Pertahanan dan kemudiannya Pengarah Jakim.

(END)